



O crodevis che a fossin cui sa cemût: fats di gâs o mechanics o di cui sa cuale sostanze... cul silici e invezit a son come nô, come nô cuant che o esistevin, dome plui smoleots. Aio di dâ un parangon? A ûs une planarie\* ma umanoide cuntun grant cjâf umanoit come consistence. Smoleots, a viazin cun astronâfs biomecanichis... insome di materiâl vivent, dûr, resistant al vueit cosmic.

A son passâts 10 milions di agns de fin de razate humane. Meteorite? No. Si son... si sin copâts bessôi, sperimentant dai virus par ûs militâr. Nol è restât in vite che il 0,1% de gjarnazie ma dopo il virus al à mutât copant ancje chei umign restâts ma... tantis bestiis no. E... velis, des simiis che a cjalin cun curiositât i visitadôrs smoleots. A van ator cuntune sorte di cjadreute/capsule/hovercraft. A son cussì delicâts che l'aiar de Tiere ur ruvine la clare celestine pyel e... a son pacifiscj! A esplorin cui lôr machinaris strâts e strâts di miserie e di glorie humanÆ! Lis citâts a son colassadis une parsore di chê altre. Epûr, chês simiatis che forsi tra un 10 milions di agns a deventaran come ch'o jerin nô umans no àn voie che i visitadôrs a vignidin a curiosâ: ur tirin pieris e bastons! Un di chei rafinâts sienziâts cun pyel blancje/celestine di tenere planarie al ven colpît te sô capsule e si capote par tiere. Daurman un trop di simiatis i rive dongje cun tantis pieris; lis besteatis a massacrin chel puaret: dut sfracaiât, lui e la capsule. Po a tachin a sgavarâ!

Forsi tra mancûl di 10 milions di agns chês tristis simiatis a saran uomini a tutti gli effetti! Maladets primâts plens di tristerie! Maladete Tiere! (cheste mê e je une vision futurÆ)

**di Checo Tam**

*\*vier plat/platelminti*